

Gui'ch par ree bén Rom 1:1 1 Gui'ch par ree bén Rom 1:12

Gui'ch ni guxhaal San Pabl loj ree bén Rom rliladx Jesucrist

Rxhiaal San Pabl xtiidx Dios

¹ Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bén badëë xtiidx Dios loj ree bejn, ³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdiaa rey Davi zaman. ⁴ Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee. ⁵ Abi' par yaza't reeman, zeel bacaabeeman naj din gacan apóstol din guidiblagaa guidxliuj chu' bén chililadx laaman, bén guzoob tëë xtiidxaman. ⁶ Abi' në lëjt ma nayab loj ree bén gule Dios din gaquidi xbejn Jesucrist.

⁷ Zeel caxhalan gui'ch guie lojdi bén rën ree Dios, bén zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëë loj Dios por gradi, guial guidibczi ruza't reeman lëjt xhienaag rliladx-idi Jesucrist. ⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaaban laaman por lëjt. ¹⁰ Ad rucwëëz tëët rbedx rniaaban Dios din guneeman mod guidganan lëjt, zi'c naj da xgaban diizd gocli. ¹¹ Din yu'czan gan guidganan lëjt din günan lëjt yudar con xtiidx Dios din sudxi'chidi lojn. ¹² Din

Gui'ch par ree bén Rom 1:13Gui'ch par ree bén Rom 1:21

güün tēedi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, rēnan gagbeedi guial zien volti da't ma benan xgab guidganan lējt, din gacxhiey ree bén chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lējt.

¹⁴ Par naj naladxan da cwentan naj guial gulün chutēez benan xtiidx Dios, bal najman bén ciuda o najman bén guiedxdoo ya, bal rignia'man o ad rignia'taman. ¹⁵ Zeel rēnnejzdoon guidganan lējt din gatiechan xtiidx Dios Rom.

Xguialrniabee xtiidxza'c Dios

¹⁶ Ad ratunē'tan xtiidxza'c Jesucrist. Din por diidxza'c guin ree zēed xguialrniabee Dios, din gra ree bén chililadx laan laa reeman loj dol, zi'c ree bén Israel zi'c ree bén ad najt bén Israel. ¹⁷ Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rēb: “Bén naban zi'c rēn Dios, guidib tiamp ni nabanman rliladxaman laaman.”

Dol ni rajp bejn

¹⁸ Dunuj ree rayagbee guial diizd xanyabaa zēed xcastiro' Dios par ree bén ad ridxga't laaman, bén ad rüjnt ree zi'c rayal, abi' zi'c naban reeman ruquie'ch reeman xtiidxli Dios. ¹⁹ Din ragbeechaaw reeman guial yu' Dios, abi' laagajcaman balüü bejn ree guial yu'caman. ²⁰ Majsi ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa tēēman naj Dios. Zeel ad zajct xhie gudxiib bejn guijc guial achet ragbeeman xcwent Dios. ²¹ Din majsi yu' ree

Gui'ch par ree bén Rom 1:223Gui'ch par ree bén Rom 1:31

bejn ragbee guial yu' Dios, per ad rajpt reeman laaman respejt zi'c rayal, ad rudëë tëët reeman quixtëë lojman, aal xgab ren ree rüjn reeman ni ad rüjnt sirv abi' gaz ragdxa reeman. ²² Rëb reeman guial rajc da't reeman abi' mazri na tont reeman. ²³ Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëël.

²⁴ Zeel ma gulëëladx Dios laa reeman loj xixgab mal reeman, abi' rüjn reeman ni natu ree con ree ben ren.

²⁵ Luar chinal reeman xdiidxli Dios, zinal reeman ni rusquiee ree. Abi' rën reeman rajp tëë reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

²⁶ Zeel gulëëladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. ²⁷ Ziangajc zien ree xinguaaaw ad nabantri xnejz, rën gajc lasa' xinguaaaw reex, xinguaaaw con xinguaaaw rüjn reex ni dxuudx, ni natu. Abi' laagajc reex rguuil xcasti reex.

²⁸ Abi' guial ad ridxga't reeman Dios, zeel gulëëladx Dios laa reeman loj xixgab mal reeman, din güün reeman ganax ni ad rayalt güün reeman. ²⁹ Ganax ni ad rayalt güün reeman rüjn reeman, za'në reeman xinguaaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëd-loj reeman, rugüjt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbëë reeman xtiidxguijdx bejn. ³⁰ Rnieeguijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rüjn reeman benro'. Abi' rbëëguijc reeman ni mal ree, ad ruzoob tëët xtiidx xdad xniaa reeman. ³¹ Dád nad reeman, ad rüjnt cumplid xtiidx

reeman, ad rént lasa' reeman, ad raya tēēt lasa' reeman.
³² Ragbeechaaw reeman rēb Dios guial chi guiēt ree bejn, dxel gra ree bén rüjn gra ree ni guin yayal casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

2

Xguialguxtis Dios

¹ Zeel chutēēz lüj guial rēbil xhie casti rayal bejn, ad rajptil derejch guiēbil zian, din lüj gajc rayal casti guin guial cayüjnł zi'cgajc rüjn reeman. ² Per dunuj ree rayagbee guial Dios rüjn guialguxtis zi'c rayal, chi rudēēdaman casti bén rüjn ree ni mal guin. ³ Abi' lüj guial rēbil xhie casti rayal bejn abi' nēgajquiza lüj rüjn zi'c rüjn reeman, ad nal-
 adxil laal loj xcasti Dios. ⁴ Ad réntil guialnaza'c Dios con lüj, ad réntil guial rdaanman lüj rajp tēēman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnł xgab por xtolil. ⁵ Per guial dád nadil, ad réntil yajejquil loj Dios, zeel lüj gajc cayüjnxhieł xtolil par dxej ni gudēēd Dios casti, dxej ni güünman guialguxtis zi'c rayal. ⁶ Par gudēēman ni rayal tijbgaj bejn bal gonin beenman. ⁷ Gudēēdaman guialnaban tiblyaa loj ree bén ad radxagt rüjn naguiejn guiban zagdxē guial rüjn reeman naguiejn yayal reeman guialnaza'c yu' xanyabaa, rüjn tēē reeman naguiejn yaya'n reeman zagdxē loj Dios din gap reeman cuerp ni ad yu't dxej nit. ⁸ Per ree bén ad ruzoobt diidx, rdxe'ch Dios laa reeman abi' gudēēdaman laa reeman casti, din luar chinal reeman xtiidxliman, zinal reeman nejz mal. ⁹ Gra ree bén zinal nejz mal, naya sac reeman sagdiaj reeman, yaloj ree bén Israel dxel bén ad najt ree bén Israel. ¹⁰ Guiáad ree bén zē loj nejz zagdxē, guilies Dios xvalor reeman, yabaanēman laa

Gui'ch par ree bén Rom 2:115Gui'ch par ree bén Rom 2:21

reeman, yabe'cdxe tääman luxdoo reeman, yaloy xgaj ree bén Israel dxelri bén ad najt ree bén Israel.

¹¹ Din Dios tiblojzi rüjnman guialguxtis con gra bejn. ¹² Gra ree bén cayüjn dol sin guial ad nünbeet reeman ley badëäd Dios loj Moisejs, täd reeman casti sin ley guin. Guiáad ree bén cayüjn dol majsi ragbee reeman ley guin, laa reeman täd casti zi'c rniabee ley guin. ¹³ Din ad guial guientzi bejn ley guin ma nayaman loj Dios, bén rüjn ree zi'c rniabee ley guin laa reeman naj bén naya loj Dios. ¹⁴ Per chi ad najt bejn bén Israel, abi' cayüjnman ni zagdxe sin guial güünbeeman ley guin, dxel ma cayüjnman zi'c rniabee ley guin majsi ad nünbeetaman laan, guialzi nünbeeman conin naj ni zagdxe con tää nin naj ni mal, abi' guijc gajc reeman zëäd xley reeman. ¹⁵ Din zi'c naban reeman, rguien guial guijc reeman zëäd conin rayal güün reeman con tää nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxe o chi ma been reeman ni mal. ¹⁶ Zian gac chi güün Dios guialguxtis por gra ree ni naguie'ch ni rüjn bénguidxliuj. Abi' zi'c culün bejn ree guidibczi, laaman güün guialguxtis por Jesucrist.

Bén Israel ree në xley Moisejs

¹⁷ Yan, lüj guial najl bén Israel yu'guijquil guial rajquil ley badëäd Dios loj Moisejs, abi' rüjnl nabë guial najl xbejn Dios, ¹⁸ rëbil guial ragbeel xhienaag rën Dios guibanl, abi' por xleyaman ragbeel conin naj zagdxe güünl. ¹⁹ Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios, ²⁰ naladxil zile' gulüül bén ad rajct ree në ree bén rajc ta'nzi, guial por ley guin ragbeel gra, ragbee tää conin naj diidxli. ²¹ Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', ¿chexquiza

Gui'ch par ree bén Rom 2:22 6 Gui'ch par ree bén Rom 3:4

zeel rbanl? ²² Rëbil guial ad laat sunë bejn bén ad najt lacheelaman, abi' lüj, ¿chexquiza zeel rüjnl zian? Rëb tëël guial rdxe'chil ni naladx bejn naj dios, abi', ¿chexquiza zeel rbanl lën yadoo lod yu' ree Dios guin? ²³ Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin. ²⁴ Ze'cli rëb loj xtiidx Dios: “Bén ad najt ree bén Israel rniee reeman Dios diidxguijdx por lëjt.”

²⁵ Diidxli rüjnqui sirv guial ru xcuerp bejn sen ni ru ree bén Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. ²⁶ Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxel ma nayabaman zi'c tijb bén yu' sen, majsi ad yu'taman sen guin. ²⁷ Bén rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin. ²⁸ Din ad guial rajlt bejn loj nacion Israel, ad guial yu' tëëtaman sen ni ru ree bén Israel ma najman bén Israel loj Dios, ²⁹ bén wali naj bén Israel loj Dios, guidib luxdooman zinalaman xnejz Dios, ad por guial yu'taman sen ru ree bén Israel, ad por xcostumbr tëët reeman, por guial naban reeman con xSprijt Dios. Abi' bén naban zian, Dios rlies xvaloraman sa'n ad bénguidxliujt.

3

¹ Zeel zanadi lon xhiecki gan naj bejn bén Israel o xhiecki gan chu'man sen ru ree bén Israel. ² Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëed Dios xtiidxaman. ³ Yan ad naladxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman. ⁴ Din laaman ad yu't dxej guchaa xtiidxaman,

Gui'ch par ree bén Rom 3:5 7 Gui'ch par ree bén Rom 3:13

majsi gra bénguidxliuj naj bén rusquiee, per Dios ad nētaman rusquiee, zi'c rēb tiblajt loj xtiidxaman lod rēb: Gra bejn güünbee lüj guial rüjn cumplid xtiidxil, abi' achet zajc gudxiib reeman guijquil.

⁵ (Per yu' bejn rüjn xgab) guial bal por dol ni cayguieen ree rulüü guial benza'c naj Dios, ¿chexquiza zeel najman benmal rudēēdaman bejn casti? ⁶ Per naj rni lojdi guial ad najt Dios benmal, din bal najman benmal xoza güün xguialguxtisaman con bénguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiēb Dios naj bejn bēndol.

⁸ Abi' mazri ma yaguieen ree ni mal din gui't ni zagdxe, zi'c rēb ree bejn culün bejn ree, per Dios gudēēd casti bén rēb ree zian.

Graczi bejn ma been dol

⁹ Zeel zi'c ma rnin por ree bén Israel, nē por ree bén ad najt bén Israel, abi' ma ragbeedi guial ad zajct guiēbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree bēndol. ¹⁰ Zi'c ca tiblajt loj xtiidx Dios lod rēb:

Achutczi naj benza'c,
per ni'qui tijb bejn.

¹¹ Achutczi rignia'.

Achutczi raguiil Dios.

¹² Gra reeman ma basa'n xnejz Dios.

Gra reeman ma zinal nejz mal.

Achutczi cayüjn ni zagdxe,
per ni'czi tijb bejn.

¹³ Zi'cgajczi tijb baa ni zojbyal,
zian ganax ni dxuudx ririi ro' reeman.
Ganax diidx rusquiee rniece reeman.

Gui'ch par ree bén Rom 3:14Gui'ch par ree bén Rom 3:26

Abi' xtiidx reeman naj zi'c xvenen bëël.

¹⁴ Ganax diidx mal ririi ro' reeman,
diidxguijdx ni rüjnnaa lasa' reeman.

¹⁵ Za'sin reeman din gugüjt reeman bejn.

¹⁶ Bantëöz guin zë reeman, rüjn reeman ni dxuudx ree.

Abi' rusagzi reeman bejn ree.

¹⁷ Ad nünbee tëtët reeman xhienaag naj gualrbajn bejn
zagdx.

¹⁸ Ad yu'guijct reeman gual rayal guidxeb reeman Dios.

¹⁹ Dunuj ree rayagbee gual gra ni zëed loj xley Dios, naj
par ree bén zinal ley guin, chitëë chu guiëb gual achut
ragbee xhienin naj dol, laan naj par gagbee bejn gual
najman béndol loj Dios. ²⁰ Din ad gual güünt bejn gra ni
rniabee ley guin ma nayaman loj Dios, ley guin rulüü din
gagbee bejn gual najman béndol.

Por gualrliladx ma naya bejn loj Dios

²¹ Per yan Dios ma balüü dunuj ree tijb nejz gual
xhienaag yayajc ree naya lojman. Ad gual yaguieentzi ree
zi'c rniabee ley guin, por ley guin në por ni bacaa ree bén
badëë xtiidx Dios loj ree bejn. ²² Rayagbee ree gual rüjn
Dios bejn cwent zi'c bén ad yu't xtol por gualrliladxaman
Jesucrist, din par Dios tiblojzi naj bejn. ²³ Din gra bejn
ma been dol, achutczi naya niz loj Dios. ²⁴ Per gual
najman benza'c, ma beenman perdon dux tol ree sin gual
yadijx ree, ma nayajc ree perdon por Jesucrist, bén gudix
por dux tol ree chi gütaman loj crüjz. ²⁵ Dios guxhaal
Jesucrist, din por xrejman chu' perdon par bénguidxliuj.
Abi' perdon guin naj par ree bén rliladx Jesucrist. Zian
rguien gual graczi rüjn Dios xnejz, abi' bal guia'xchej ad
beent xgualguxtisaman por dol ni been ree bejn, laan naj
por pacens ni rajpaman con bejn, ²⁶ gual ma ragbeeman
goc güün xgualguxtisaman. Zian rusnuu rulüüman gual

Gui'ch par ree bén Rom 3:27 9 Gui'ch par ree bén Rom 4:6

graczi rüjnman xnejz, zeel rüjnman perdon xtol ree bén riladx Jesucrist.

²⁷ Yan, ¿xhienaag yaguieen ree nabë? Achet yaguieen-në' ree nabë, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist. ²⁸ Zeel rayagbeechaaw ree guial Dios rüjn perdon xtol ree bejn guial riladx reeman Jesucrist, ad guial rüjnt bejn naguiejn güünman gra ni rniabee ley guin.

²⁹ ¿Wen xDiosi ree bén Israel naj Dios ya, ad nët ree bén ad najt bén Israel naj xDios laaman ya? Naj rni lojdi guial Dios naj par gra bejn, ³⁰ din tijbzi Dios yu', laaman rüjn perdon xtol ree bén riladx Jesucrist, yu'man o ad yu'taman sen ni rniabee ley chu' ree bén Israel. ³¹ Ad naladxidi cayguieen ree ley guin tiblax guial raliduladx ree Jesucrist, din ad ziantan, guial raliduladx ree laaman rguien guial nadxu'guijc ree ley guin.

4

Xguialriladx Abraham

¹ Yan, ¿xhie zajc yaguie'ch ree xcwent dux béngulal ree Abraham? ² Bal niyab Abraham zi'c tijb bén gad güün dol por ree ni beenman, guyu mod nüjnman nabë loj ree bejn, per ad lojt Dios. ³ Din rëb loj xtiidx Dios: “Guial bililadx Abraham Dios, zeel been Dios laaman cwent zi'c tijb bén ad beent dol.” ⁴ Chi rüjn bejn dxiin, milia ni rajxaman ad ni razaladxt reeman, rtia'man laan por dxiin ni rüjnman. ⁵ Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëëdan guial riladx bejn Jesucrist, zeel rüjn Dios bejn cwent zi'c bén ad yu't xtol. ⁶ Zi'c gunee rey Davi guial xiquilbaa ree bén been

Gui'ch par ree bén Rom 4:710Gui'ch par ree bén Rom 4:15

Dios cwent sin dol sin guial güün reeman xhienin par yayal reeman perdon guin. ⁷ Rëbaman:

Xiquilbaa ree bén been Dios perdon xtol,
bén ma badxi'caman xtol.

⁸ Xiquilbaa ree bén ma been Dios cwent sin dol.

⁹ Ad guneet Davi diidx guie ree naabzi par bén yu' ree sen ni ru ree bén Israel, guneeman diidx guin ree par gra ree bejn. Din zi'c ma raguie'ch ree, Dios been Abraham cwent zi'c bén ad yu't xtol guial bililadxaman laaman.

¹⁰ Abi' chi biyabaman zi'c bén ad yu't xtol, ni'qui gadaman chu' sen ni ru ree bén Israel, chi gad Abraham chu' sen guin mal nüjn Dios laaman cwent zi'c bén ad yu't xtol.

¹¹ Chi biabaman zi'c bén ad yu't xtol, dxel guyuman sen guin din sen guin naj guial ma nüjn Dios laaman cwent zi'c bén ad yu't xtol guial bililadxaman laaman. Zeel naj Abraham dad par ree bén rliladx Dios, majsi ad yu't reeman sen ni ru ree bén Israel, per por gualrliladx guin nüjn Dios laa reeman cwent zi'c bén ad yu't xtol. ¹² Naj tää Abraham dad par ree bén majsi yu' sen guin per rliladx reeman zi'c bililadx Abraham Dios diidx chi gadaman chu' sen guin.

Promejs ni been Dios loj Abraham

¹³ Chi been Dios promejs loj Abraham në loj ree xdi-aaman, guial gudëédaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb bén ad yu't xtol. ¹⁴ Yan bal ganaxzi ree bén zinal ley guin tia' ni gudëë Dios, achet cwent naj gualrliladx ree bejn laaman, ache tää cwent naj promejs ni been Dios loj Abraham. ¹⁵ Din ley guin najn par castizi, per lod ad yu't ley, ad yu't mod chu guiëb guial ad cayüjnt bejn ley guin cumplid.

¹⁶ Zeel chi been Dios promeys loj Abraham guial gudëë-daman ni rëbaman par gra ree xdiaaman, beenman promeys guin lojman guial bililadx Abraham guin laaman, din guiguien guial najman benza'c abi' ad parzi ree bén zinalt ley guin naj promeys guin, nëgajc par ree bén rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. ¹⁷ Zi'c ca loj xtiidx Dios lod rëbaman loj Abraham: “Lüj gac dad par zien ree bénguidxliuj.” Zian naj promeys ni been Dios loj Abraham, Dios bén rusban ree bengüt abi' rnieeman xcwent ree ni gad chu' loj guidxliuj guie zi'c rulüü ma yu' reen.

¹⁸ Majsi ragbeechaaw Abraham guial ad zajctaman famil, per chi rëb Dios lojman zian, bililadxaman ni rëb Dios, bililadxaman guial gac gra ni rëbaman lojman. Zianan zeel najman dad par gra ree bén rliladx Dios zi'cgajc laaman. Zi'c rëb Dios lojman, chi rëbaman: “Zian gaquil famil, dád famil narooob gaquil.” ¹⁹ Cost tibgayuu ijz ma yu' Abraham naxel, ragbeeman guial ma naj reeman bengol në xbéngunaaman Sara guial chu' xi'n reeman, per ad guyunawëëgtaman, bililadxaman ni rëb Dios lojman. ²⁰ Ad yu't dxej ad bililadxtaman ni rëb Dios. Diidxli bililadxaman laaman abi' rudëëman quixtëë lojman, ²¹ din guidiblagaa bililadxaman guial rajp Dios guialrniabee güünman zi'c ma rëbaman. ²² Zeel been Dios cwent Abraham zi'c tijb bén ad yu't xtol.

²³ Abi' lod rëb guial been Dios laaman cwent zi'c bén ad yu't xtol guial bililadxaman laaman, ad tijbtzi Abraham ruza't yagaj, ²⁴ nëgajc dunuj ree din ma raliduladx ree Dios. Abi' në dunuj ree ma nünman cwent zi'c bén ad yu't xtol, Dios bén basban Dad Jesucrist loj guialgüjt, ²⁵ Dad Jesucrist bén güt por dux tol ree, dxel babanman abi' por laaman ma naya ree loj Dios.

5

Chi ma naya bejn loj Dios

¹ Ma nüjn Dios dunuj ree cwent zi'c bén ad yu't xtol guial raliduladx ree laaman, zeel ma nadxu' ree zagdxe con laaman por xguialgüjt Dad Jesucrist. ² Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëéz ree yayal ree xanyabaa lod za'man. ³ Abi' ad ziantzi, në guial yu' du luxdoo ree zagdxe por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens. ⁴ Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. ⁵ Ni ralëéz ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bén ma baneeman duloj ree.

⁶ Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree béndol. ⁷ Dunuj ree rayagbee guial nawëég naj chu' bén tiëb guiët por zatijb bejn. Ni'czi por tijb bén naban xnejz, o wed yu' bén tiëb guiët por tijb benza'c da't. ⁸ Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree béndol. ⁹ Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. ¹⁰ Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bén guxhal nejz par loj Dios. ¹¹ Abi' ad laatzan, në guial yu' du luxdoo ree nix radëéd ree quixtëé loj Dios por Dad Jesucrist, din por laaman ma nadxu' ree zagdxe con Dios.

Gui'ch par ree b́en Rom 5:1213Gui'ch par ree b́en Rom 5:21

Adán nē Cristo

¹² Por tijb xinguaiaaw guzuloy guyu dol loj guidxliuj, abi' por dol guin guzuloy guyu guialgüjt, gra ree bejn bayal guialgüjt guin guial been reeman dol. ¹³ Diizd chi gad ley ni badëed Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol. ¹⁴ Per majsi zian, bidxinczi dxej ni güet reeman, diizd xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb b́en naj gui't.

¹⁵ Din garen naj dol ni been Adán guial loj perdon ni zëed por Dios. Por xtol tijb bejn guzuloy guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, nē ni mazri zagdxe par zien ree bejn. ¹⁶ Din garen naj dol ni been Adán guial loj perdon ni runeet Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. ¹⁷ Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree b́en rliladx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

¹⁸ Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon nē guialnaban loj Dios. ¹⁹ Din por tijb b́en ad bazoobt diidx gra bejn naj b́endol. Per ziangajc por tijb b́en bazoob diidx ma zajc gap bejn perdon loj Dios.

²⁰ Abi' Dios badëe ley loj Moisejs, din por ley guin gag-bee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon. ²¹ Guia'xchej

Gui'ch par ree bén Rom 6:11Gui'ch par ree bén Rom 6:11

gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nünman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

6

Ma bayëjt ree par dol per nabajnnë' ree Jesucrist

¹ Ad naladxidi canin lojdi guial yaguieen ree dol mazri din guiën Dios dunuj ree mazri. ² Din ad ziantan, ma bayëjt ree par dol ad rayaltri yaguieenz yaguieen ree dol. ³ Din gol bignia' guial chi barobnijs ree por Jesucrist, laan naj zi'c rülüü guial në dunuj ree ma bayëjt con laaman. ⁴ Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

⁵ Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree. ⁶ Din dunuj ree rayagbee guial chi güjt Jesucrist loj crüjz, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree. ⁷ Din bén ma güjt por dol, ad rniabeetri dol guin laaman. ⁸ Abi' guial güjt Jesucrist por dux tol ree, zeel ma bayëjt ree par dol guin, yabajn tëë ree con laaman. ⁹ Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman. ¹⁰ Con tivoltizi güjt Jesucrist por xtol ree bejn, yan ma nabanman par Dios. ¹¹ Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

Gui'ch par ree b en Rom 6:1215Gui'ch par ree b en

¹² Zeel la'tgaj nabandi loj guidxliuj guie ad ti ebidi nabee dol l jt, ad ti b t edi g iin ree xgabdxuudx l jt gan. ¹³ Ad cw eladx l jt gajc loj dol par g iindi ni mal, zagdxeli gol cw jnb nabee Dios l jt, zi'c tijb b en ma g jt, abi' yabandi par laaman. Gol cw jnb nabeeman l jt par g iindi ni zagdx. ¹⁴ Zian ad zanabeetri dol l jt, per ad por guial yu'guijctidi ni r b ley ad g iindi, ad zanabeetri dol guin l jt por guial zinalidi guial r n Dios l jt.

Ma gulaa ree loj dol

¹⁵ Ad canitan por guial ma zunaal ree guial r n Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. ¹⁶ L jt ragbee bal yu' chu rniabee dunuj ree, yazoob ree xtiidx b en rniabee dunuj ree. Yan bal dol guin rniabee l jt yayalidi casti, per bal ruzoobidi xtiidx Dios dxel ma rayalidi perdon. ¹⁷ Per quixt e Dios guial majsi guia'xchej gunabee dol l jt, per yan con guidib luxdoodi ma zinalidi xtiidx Dios zi'c ma basiididi. ¹⁸ Abi' yan guial ad rniabeetri dol l jt, ma nabandi din g iindi zi'c r n Dios. ¹⁹ (Canen 'n l jt con ganax diidx ni zajc chignia'di xhie r n gui b ni canin, din ragbeen guial naw eg naj chignia'di ni guin ree.) Zi'c gunabee dol l jt guia'xchej persi beendi ni dxuudx ree n  graloj ree ni mal, ziangajc yan guidiblagaa gol cw jnb nabee Dios l jt din gac g iindi ni zagdx guiban t edi zi'c r nman.

²⁰ Chi gunabee dol l jt ni'quid guyutidi xgab nibajndi zi'c r n Dios. ²¹ Per,  xhieza gan beendi por ni mal ni beendi nadxel, ni mal ni ratun di yan guial ma ragbeedi por laan z ed xcasti Dios? ²² Per yan guial ad rniabeetri dol l jt ma zinalidi xnejz Dios, abi' laan naj ni zagdx din por zian ma zajc guibandi zi'c r n Dios gap t edi guialnaban tiblayaa con laaman. ²³ Din ni r jn bejn gan por dol

Gui'ch par ree bén Rom 7:1 16 Gui'ch par ree bén Rom 7:8

laan naj casti, per ni razaladx Dios naj guialnaban tiblayaa par ree bén ma naj tijbzi con dux Dad ree Jesucrist.

7

Ni naj zi'c guialruxhliaa

¹ Compniar raliduladx ree Jesucrist, lëjt ragbee xhien-aag naj tijb ley. Ley guin naj ni rniabee bejn la'tgaj nabanman. ² Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren. ³ Zeel bal naban lacheelaman abi' guchajgaman ben ren, dolan cayüjnman. Per bal ma güjt lacheelaman dxel achet ley gudxoon guial guxhli-aanëman ben ren ad cayüjn tëëtaman dol.

⁴ Ziangajcan lëjt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yaguieen ree zi'c rën Dios yaguieen ree. ⁵ Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. ⁶ Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tëë mod ni nabajn ree, ma zajc yaguieen ree zi'c rën Dios por xSprijtaman bén nabajnnë' ree, ad guial nadxu'guijct ree ley guin.

Ley con dol

⁷ Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tëëtan guial dol naj guialrzëëbladx, bal id rëb loj ley guin: “Ad sëëbladxil.” ⁸ Per chi gogbeen guial ni mal naj guialrzëëbladx, mazri gojcxhiey da dolan por gra ni guzëëbladxan. Bal id yu' ley, ad zagbeet bejn xhienin naj

Gui'ch par ree bén Rom 7:917Gui'ch par ree bén Rom 7:23

dol. ⁹ Chi gadan günbee ley guin, par naj zagdxe nabanen. Per chi benbeen ley guin, gogbeen guial cayünan dol abi' por dol guin rayalan casti. ¹⁰ Bi't ley guin din gagbee bejn xhienaag guibanman, per par naj bi'tzan par gudëëdan naj casti. ¹¹ Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

¹² Zeel ad ni malt naj ley guin din loj Dios zëëdan abi' gra ni zëëd loj ley guin loj Dios zëëdan, abi' zagdxe xnejz tëë naj ni rëb loj ley guin. ¹³ Ad ley guint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

¹⁴ Dunuj ree rayagbee guial por Dios zëëd ley guin, per guial najn bénguidxliuj zeel zianczi rüjn dol guin naj gan. ¹⁵ Ad rignia'tan xhienin rajcan, din ad rüntan ni rënan, aal ni ad rëntan rünan. ¹⁶ Abi' chi rünan ni ad rëntan günan, zian ragbeen guial ni zagdxequi naj ley guin, din por ley guin ragbeen xhienin cayünan. ¹⁷ Zeel ad najtczi rün guial rünan ni ad rëntan, rünan laan guial najn bëndol, abi' zianczi rüjn dol guin naj gan. ¹⁸ Din guial najn bénguidxliuj, ragbeen guial ni'czi ta'n ad najtan benza'c, majsi rënan günan ganax ni zagdxe, per ad rajctan. ¹⁹ Ad rüntan ganax ni zagdxe ni rënan günan, aal ganax ni mal rünan ni ad rëntan günan. ²⁰ Yan bal rünan ni ad rëntan günan, ad najtczi rün par günan laan, rünan laan guial najn bëndol abi' zianczi rüjn dol naj gan.

²¹ Ragbeen guial majsi rënan günan ganax ni zagdxe, per laa za' gajc dol guin par güünan naj gan. ²² Dád ruladxan gra zi'c rniabee Dios günan, ²³ per yu' ni rudxoon günan laan, abi' ni rudxoon guin naj dol, guial sta naban dol guin luxdon abi' zianczi rüjnan naj gan.

Gui'ch par ree bén Rom 7:2418Gui'ch par ree bén Rom 8:8

²⁴ ¡Prob naj! ¿Chu zajc yabëë naj loj casti rayalan por dol ni rünan guial naj naj bénguidxliuj? ²⁵ Per quixtëë Dios guial por dux Dad ree Jesucrist ma gulaan loj casti guin. Diidxliczi da xgaban naj guial günan ganax ni rniabee Dios, per guial najn bénguidxliuj zeel zianczi rüjn dol guin naj gan.

8

Guialnaban runee xSprijt Dios

¹ Gra ree bén rlliladx Jesucrist ad rayaltri reeman xcasti Dios, bén ad nabantri ree zi'ctzi rën reeman, laa reeman ma rüjn reeman naguiejn naban reeman zi'c rniabee xSprijt Dios. ² Din por xguialrniabee xSprijt Dios, bén runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal tëëtri ree xcasti Dios. ³ Guial nayajc ree bénguidxliuj ad bile't nüjn ley dunuj ree yudar, ley ni badëëd Dios loj Moisejs. Per yan ma been Dios ni ad bile't nüjn ley guin. Laaman guxhaal Xi'n loj guidxliuj zi'cgajczi tijb bénguidxliuj persi güjtaman por dux tol ree chitëë nabeeri dol dunuj ree. ⁴ Laaman been zian, din yaguieen ree zi'c rënman zi'cgajc tijb bén cayüjn zi'c rniabee ley guial ad nabantri ree zi'ctzi rayën ree, ma nabajn ree zi'c rniabee xSprijt Dios.

⁵ Bén naban ree zi'ctzi naj xixgab reeman, mazri yu'guijc reeman güün reeman zi'ctzi rën reeman. Per ree bén naban zi'c rniabee xSprijt Dios, mazri yu'guijc reeman güün reeman zi'c rniabee Sprijt guin. ⁶ Guial yu'guijc bejn güünman zi'ctzi naj xixgabaman zeel zëëd casti. Per bén yu'guijc güün zi'c rniabee xSprijt Dios, zajpaman guialnaban con Dios yabe'cdxe tëë Dios luxdooman. ⁷ Bén yu'guijc ree guiban zi'ctzi naj xixgab reeman, rdxe'ch Dios laa reeman din ad rënt reeman guzoob reeman xtiidxaman ad rile' tëët güün reeman zi'c rënman. ⁸ Zeel

Gui'ch par ree bén Rom 8:919Gui'ch par ree bén Rom 8:21

bén naban ree zi'ctzi naj xixgab reeman, ad ruladxt Dios ni rüjn reeman.

⁹ Per lëjt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabannëdi xSprijt Dios. Din bén ad nabannët xSprijt Dios, ad najtaman xbejn Cristo. ¹⁰ Per bal ma nabannëdi Cristo, rën guiëban guial ma güjtidi par dol, ma nabannëdi xSprijt Dios din ma nüjn Dios lëjt cwent sin dol. ¹¹ Abi' bal ma nabannëdi xSprijt Dios, bén basban Jesucrist loj ree bengüt. Majsi guiëtidi per zasban Dios lëjt din tia'di zatijb guialnaban por xSprijt Dios bén nabannëdi.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. ¹³ Din bal nabandi zi'ctzi naj xixgabidi, dxel yayalidi casti, per bal por xSprijt Dios bén nabannëdi ma basa'ndi dol tiblax dxel ma gapidi guialnaban tiblyaa con Dios.

¹⁴ Gra ree bén rtiëjb rniabee xSprijt Dios laa reeman, laa reeman naj xi'n Dios. ¹⁵ Din ad nabannët reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: “¡Dad!” ¹⁶ Din xSprijt Dios rusni dunuj ree persi rayagbee ree guial ma nayajc ree xi'n Dios. ¹⁷ Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

¹⁸ Ma benan xgab guial achet lasajc guialrzagdiaj ni caydüüd ree yan guial loj guialnaza'c ni yaca' ree xanyabaa. ¹⁹ Abi' xt gra ree ni badxe' Dios loj guidxliuj, ma rën nejzdoo reen guidxin dxej guiguien chu ree nin naj xi'n Dios. ²⁰ Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin ²¹ yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx

Gui'ch par ree b en Rom 8:2220Gui'ch par ree b en Rom 8:30

yu' loj guidxliuj guie. ²² Per la'tgaj cab ez guidxliuj guin guidxin dxej guin, dunuj ree rayagbee guial d ad naya cazagdiajn zi'c rzagdiaj tijb b engunaa chi ma gal xi'nman. ²³ Abi' ad tijbtizi guidxliuj guin cazajc zian, n egajc dunuj ree guial nabajnn e' ree xSprijt Dios zi'c tijb sen por ni guneer Dios duloj ree. Abi' cayzaagdiaj ree la'tgaj cayl ejz ree guidxin dxej ni guiguieren guial nayajc ree xi'n Dios, dxej ni guidxaa dux cuerp ree chi yaya'p ree cuerp c ub. ²⁴ Dunuj ree rayagbee guial gac zian, laan naj ni ral ejz ree guialraliduladx ree ma nayajc ree perdon. L ejt ragbee bal ni ral ejz ree ma gojcan, ad zal  eztri reen din ad zajctri cw ez bejn ni ma gojc. ²⁵ Per bal gad ni cayl ejz ree gac, ad rayalt yadxag ree yal  ez ree gacan.

²⁶ Abi' xSprijt Dios ragn e dunuj ree chi ad rayagbeet ree xhie yaguieren ree, din yu' dxej loj hor guin ad riler' yarejdx yanaab ree Dios zi'c rayal. Abi' chi ad rayagbeet ree xhienaa yaguier'ch ree loj Dios, xSprijt Dios mal ragbee dux quiarguieren ree, dxel laaman rbejdx rniab Dios por dunuj ree. ²⁷ Abi' Dios, b en n unbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c r en Dios.

Achet zajc g uun dunuj ree gan

²⁸ Dunuj ree rayagbee guial gra ni cayza'c ree loj guidxliuj guie naj ni g uun sirv par dunuj ree guial ray en ree Dios, dunuj ree guial bazoob ree xtiidxaman par yaguieren ree zi'c r enman. ²⁹ Abi' diisd guiar'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj b en nabee loj gra ree b en naj Xi'n Dios. ³⁰ Gra ree b en ragbee Dios guial chililadx reeman laaman, rbejdxaman laa reeman din gac reeman xbejnman, r ijnman

Gui'ch par ree bén Rom 8:3121Gui'ch par ree bén Rom 9:2

laa reeman cwent sin dol abi' rudëëman xanyabaa loj reeman lod zobaman.

³¹ Yan, guial ma rayagbee ree gra ree ni guie, achet güünan chutëëz güün xcontr dunuj ree, dunuj ree rayagbee guial Dios gagnë dunuj ree. ³² Ad gurexuut Dios nudëë Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya? ³³ ¿Chu zajc cwe'c dux guialquia ree nayajc ree bén ma gulej Dios? Din Dios ma nüjn dunuj ree cwent sin dol. ³⁴ Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. ³⁵ Zi'c rën Cristo dunuj ree, achut zajc yala' dunuj ree con laaman. Ni'qui por guialyu'naya, o por guialzi, o por ni rüjn bejn dunuj ree, o por guialrliaan, o por guial ryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman. ³⁶ Zi'c rëb loj xtiidx Dios:

Guial nayajcan xbejnl, zianczi nadxu'n loj guialgüjt.

Rüjnnë reeman dunujn zi'c ree xiil ma naj guiët.

³⁷ Per ni'qui tijb ni guin ad züjnt dunuj ree gan guial ragnë Cristo dunuj ree, bén rën dunuj ree. ³⁸ Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëëd gac, ³⁹ o ni zëëd xanyabaa, o lën liuj, ni'qui tijb ni been Dios, achetczi achut tëët zajc chiquied guialrën Dios dunuj ree por dux Dad ree Jesucrist.

9

Dios gulej bén Israel ree

¹ Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, ² guial

Gui'ch par ree b n Rom 9:32Gui'ch par ree b n Rom 9:14

guixie guixie d d yu'naya luxdoon, xt ni'quid radxejlt xhie g nan. ³ Balzianclaa majsi ad zayaltan perdon, majsi g  n Cristo naj tibl d, per bal zian chile' g nan yudar b n ladx reen chit e yaya reeman casti. ⁴ Laa reeman naj b n Israel, abi' laa reeman naj b n gule Dios din gac reeman xbejnman. Abi' guzujman con laa reeman zi'c form tijb zaj, baya'nn man laa reeman diidx conin g  nman con t  nin g  n reeman, bad e t e xleyaman loj reeman. R baman loj reeman xhienaag gui n reeman laaman, been t eman promejs loj reeman. ⁵ Z ed reeman loj xdiaa ree b n been ree sirv loj Dios gulal, loj gajc ree b n z ed Cristo chi bi'taman loj guidxliuj, laaman naj b n nagle' zianczi rajp t eman guialrniabee loj gra ni yu'. Am n.

⁶ Ad canitan guial ad z jntri Dios xpromejsaman cumplid, ni canin naj guial ad grat ree b n Israel naj xbejn Dios. ⁷ Ad guial z edt reeman loj xdiaa Abraham din gac reeman xdiaaman, din r b Dios loj Abraham: “Diizd xi'nl Isaac suloj xdiaal.” ⁸ Laan rul   dunuj ree guial ad por guial najt bejn b n Israel, ma najman xbejn Dios, xbejn Dios naj ree b n naj cwent loj xdiaa Abraham guial rliladx reeman xtiidx Dios zi'c Abraham. ⁹ Din Abraham bililadxaman Dios chi r b Dios lojman: “Zatib ijz tiamp guie gajc guialan abi' dxej zii ree ma ca' Sar tijb xindob z.”

¹⁰ Abi' ad laatzan. Grop ree xi'n Rebeca gojc xdad reex Isaac, b n goc dux b ngulal ree, ¹¹⁻¹³ per chi gad reex gal, chi ad way jn t et reex ni zagdx ni'qui ni mal, r b Dios loj Rebeca: “Xin yaloy guin laax g  n sirv loj xinguiag guin.” Zi'c r b loj xtiidx Dios lod r b: “Guy nan Jacob, per bidxe'chan Esa .” Zian rguien guial ma ragbee Dios chu rbeman ad por ni r jnt bejn, laaman ma ragbee chu rucaabeeman.

¹⁴ Yan,  por zian yaguie'ch ree ya, ad r jnt xguialguxtis

Gui'ch par ree bén Rom 9:1523Gui'ch par ree bén Rom 9:25

Dios zi'c rayal? ¡Per ad ziantan! ¹⁵ Din Dios rëb loj Moisejs: “Yayan bén rënan yayan abi' bén rayal ree casti, bal rënan ad zudëëdtan laa reeman casti.” ¹⁶ Zeel ad zile't yaya Dios bejn por xixgabzaman o por ni rüjnman, laaman mal ragbee chu rënman yayaman. ¹⁷ Loj xtiidx Dios rëb guial rëbaman loj rey Egipto: “Naj ben lüj rey din guiguien da guialrniabeen din güünbee gra bénguidxliuj naj.” ¹⁸ Zeel rnin lojdi guial ma ragbee Dios chu yayaman chu tää güünman luxdoo gojl.

¹⁹ Per wed por zian nadi: “Bal zianan, ¿chexquiza zeel rdxe'ch Dios guial nayajc ree zi'c nayajc ree awa ad zajct yadxon ree zi'c naj xixgabaman?” ²⁰ Per, ¿chu naj bénguidxliuj din guinieeman Dios zian? Wen zajc guiëb tijb guiajs loj bén been laan ya: “¿Chexc zeel beenl naj zian?” ²¹ ¿Nid bén rüjn guiajs guin rüjnnë bajn guin zi'ctzi rënman ya? Laaman ruguiaa xhie güünnëman bajn guin, bal güünman guiajs güün dxiin guixie guixie o güünman guiajs güün dxiin dxej zobjlojzi ree.

²² Yan, ziangajc Dios ma ragbeeman chu rayal casti, abi' xt zajc laa nudëëd gajcaman casti din guiguien xguialrniabeeman. Per gudaanman gojp tääman pacens bén ad ruzoobt ree diidx, bén rayal ree nit. ²³ Gudaanman laa reeman din guiguien guial laaman guinia xhienaag güünman, guial laaman naj bén ca' guialrniabee abi' bayaman bén ragbeeman diizd guia'xchej guial yayal reeman xanyabaa. ²⁴ Abi' laa reeman naj dunuj ree bén ma gurejdx Dios, loj ree bén Israel në loj ree bén ad najt bén Israel. ²⁵ Zi'c ca loj libr ni bacaa Oseas bén badëë xtiidx Dios loj ree bejn, lod rëb:

Bén ad najt ree da bejnan,
guiën loj reeman guial naj reeman da bejnan,
abi' ree bén ad yu't bén rën laa reeman,
naj guiën laa reeman.

Gui'ch par ree b́en Rom 9:2624Gui'ch par ree b́en Rom 10:2

²⁶ Abi' lod rēb Dios loj ree bejn: “Ad da bejntan lējt”.

Yagaj gac reeman xbejnman, laaman guial najman b́en naban.

²⁷ Guiáad Isaías b́en badēē xtiidx Dios loj ree bejn, rēbaman por ree b́en Israel: “Majsi zien da't naj ree b́en Israel zi'c üx riga' ro' nijsdoo, per ta'nz naj ree b́en laa loj casti, ²⁸ din Dios nayob güün cumplid xtiidxaman loj guidxliuj guie zi'c ma rēbaman.” ²⁹ Abi' diizd gocli rēb Isaías loj ree bejn:

Bal nitiējb dux Dad ree Dios

b́en rajp gra guialrniabee

ninijt gra ree dux b́engulal ree,

diizd gocli mal gunijt dux diaa ree

zi'c gunit ree b́en Sodoma nē ree b́en Gomorra.

B́en ad najt ree b́en Israel ma naj reeman perdon loj Dios

³⁰ Yan, ¿xhie yaguie'ch ree? B́en ad najt ree b́en Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rililadx reeman Jesucrist. ³¹ Abi' ree b́en Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan. ³² ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” ³³ zi'c ca loj xtiidx Dios lod rēb: Ma gulen tijb bejn luguiedx Sión, b́en gac zi'c tijb guiaj ni ladx guia' ree bejn abi' gusajban laa reeman. Abi' b́en chililadx laaman ad yu't dxej yaya'nxtuman.

10

¹ Compniar raliduladx ree Jesucrist, ni rēnan rniaab tēen loj Dios naj guial gac ree b́en Israel perdon. ² Din

Gui'ch par ree b́en Rom 10:325Gui'ch par ree b́en Rom 10:13

naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdxe xhienaag rën Dios güün reeman. ³ Din ad rtiëjbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon. ⁴ Din por Jesucrist bayaaloj zi'c rniabee ley güün bejn, yan b́en rliladx ree laaman, ma naya reeman loj Dios.

⁵ B́en rën gac naya loj Dios guial zinalaman ley, rëb Moisejs guial b́en güün zi'c tal rëb ley, zajpaman guialnaban la'tgaj cayüjnman zi'c rniabee ley guin. ⁶ Per guial rajc bejn naya loj Dios por guial rliladxaman Jesucrist, naj guial ad züjntaman xgab: “¿Chuczi zajc chë'p xanyabaa?” (Din rën guiëban guial ad rliladxtaman, abi' rënman guguaaman guiat Cristo loj guidxliuj.) ⁷ Ad guiëb tēëman: “¿Chu zajc che lod za' ree bengüt?” (Din rën guiëban guial ad rliladxtaman, abi' rënman guguaaman yaban Cristo loj ree bengüt.) ⁸ Per loj xtiidx Dios rëb: “Gajxh za' xtiidx Dios con lüj, ryaadxzi güünl xgab guiëb tēël bal chililadxil laan.” Din guialrliladx ni ratie'ch ree naj ze. ⁹ Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon. ¹⁰ Din chi chililadx bejn Jesucrist con guidib luxdooan, diizd loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

¹¹ Abi' loj xtiidx Dios rëb: “Gra ree b́en chililadx laaman ad yu't dxej yaya'nxtu reeman.” ¹² Laan rën guiëb guial loj Dios tiblojzi naj bejn, achet güünan chutëöz najman, bal najman b́en Israel o ad najtaman b́en Israel. Din tijbzi Dios naj Dad par dugra ree, abi' dád benza'can con gra ree b́en rbejdx rniab laaman. ¹³ Din loj xtiidx Dios rëb: “Gra b́en

Gui'ch par ree b en Rom 10:1426Gui'ch par ree b en

yanab perdon loj Dios, gacaman perdon.” ¹⁴ Per,  xhieza naag cwedx guiniab reeman laaman awa ad waliladxt reeman laaman?  Abi' xhieza naag chililadx reeman laaman awa ad wacaagdiajgt reeman xcwentaman?  Xhienaag guiguiejn reeman xcwentaman awa achut b en guiniee xtiidxaman loj reeman? ¹⁵  Xhienaag chu' b en guitie'ch xtiidxaman awa achut guixhiaal laa reeman? Loj xtiidx Dios r b: “ Ni za'cdxoon naj chi rdxin b en zin  ruson zagdxel!”

¹⁶ Per ad grat bejn ridxga' xtiidxza'c Dios. Zi'c r b Isa as: “Dad,  chu ma rliladx ni ranen por l j?” ¹⁷ Zeel guialrliladx z  d por ni rigueiejn bejn, abi' ni rigueiejn bejn naj xtiidxza'c Jesucrist.

¹⁸  Wen nid wagueiejn ree bejn laan ya?  Per naj rni guial ma bacaagdiajg reeman laan! Din loj xtiidx Dios r b:
Guidib guidxliuj ma bire'ch xtiidx Dios
abi' xt luar bigra lod nagueie'ch ma bigueiejn reeman
xtiidxaman.

¹⁹ Yan r nan xgab:  Wen id rignia' ree b en Israel xtiidx Dios ya? Per diizd guia'xchej bacaa Moisejs ni r b Dios por laa reeman chi r baman:

Naj g n din t dlojdi por ni g nan

con ree b en ad najt b en Israel.

N  por ni g nan con laa reeman,

majsi ad ragbeet reeman, abi' zadxe'chidi.

²⁰ Abi' sin guialrdxeb bacaa Isa as ni r b Dios por ree b en Israel, chi r baman:

B en naj ree b en Israel, majsi ad baguiilt reeman naj,

per badxejl reeman naj.

Abi' ma bal lon loj reeman,

majsi ad gunabdiidxt reeman por naj.

Gui'ch par ree bén Rom 10:2127Gui'ch par ree bén Rom 11:9

²¹ Bacaa tëë Isaías ni rëb Dios por ree bén Israel, chi rëbaman: “Dëchej za'n rbedxan bejn ree abi' ad rënt reeman guzoob reeman diidx al rusagloj reeman naj.”

11

Xixgab Dios

¹ Ad canitan lojdi guial ma gulëëladx Dios bén Israel ree, din ad ziantan. Lëjt ragbee guial bén Israel naj abi' loj xdiaa Abraham zialan, guial zialan loj xdiaa Benjamín.

² Diisd guia'xchej, gulej Dios bén Israel ree din gac reeman xbejnman, zeel ad rbëëladxtaman laa reeman. ¿Nid rusaaladxidi tiblajt loj xtiidx Dios ya lod zëëd chi gule'c Elías bén badëë xtiidx Dios loj ree bejn xguialquia ree bén Israel loj Dios? Chi rëbaman: ³ “Dad, ma bagüjt reeman gra ree bén badëë xtiidxil loj ree bejn ma bachijl tëë reeman xialtar reel, najzi baya'n abi' nëgajc naj rën reeman gugüjt reeman.” ⁴ Per badxi' Dios xtiidxaman rëbaman: “Ma gulëcan gajdx mil bejn par naj, bén ad wazuxibtcsi ree loj dios la Baal.” ⁵ Yan ziangajc yu' ta'n bén Israel, por guial rayaman laa reeman gulejman laa reeman par laaman. ⁶ Abi' bal guial rayaman laa reeman gulejman laa reeman, ad por ni cayüjnt reeman, din bal nibejman laa reeman por ni cayüjn reeman dxel ad por guial rayatraman laa reeman.

⁷ Zian gojc, bén Israel bén gule Dios, badxejl reeman laaman guial rliladx reeman laaman. Per ree bén Israel ren gad reeman yadxelj laaman, din raguiil reeman laaman zi'c naladx reeman, ad raguiilt reeman laaman zi'c rënman zeel beenman luxdoo reeman gojl, ⁸ zi'c rëb loj xtiidx Dios lod rëb: “Basiaaw Dios xquiarguejn reeman, abi' naj reeman zian xt yandxej, majsi ruguiaa reeman per rulüü ad ruguiaat reeman, abi' majsi rigueiejn reeman per rulüü ad rigueijnt reeman.” ⁹ Rëb tëë Davi:

Gui'ch par ree bén Rom 11:1028Gui'ch par ree bén Rom 11:18

Xguialraw zagdxe reeman con gra xguialnaza'c reeman
laan gusquiee laa reeman guial zëqui reeman zagdxe.
Laan gusquiee laa reeman din téd reeman casti ni rayal
reeman.

¹⁰ Yaya'n reeman zi'c tijb bén ad ruguiaat,
abi' sac reeman zi'c tijb bén ca bëw xijch.

Gac ree bén ad najt bén Israel perdon

¹¹ Ad canitan lojdi por guial ad rtiëjbt ree bén Israel
güün reeman zi'c rën Dios zeel ma gunijt reeman loj Dios,
din ad ziantan. Guzajc reeman zian din chu' mod gac ree
bén ad najt ree bén Israel perdon, din chile' sëëbladx ree
bén Israel gap reeman perdon guin. ¹² Yan bal guial ad
bazoobt ree bén Israel diidx, beenan sirv par din yayal los
demazri ree bénguidxliuj xguialnaza'c Dios, bén ad najt
ree bén Israel. Yan, ¿rjündi xgab ya xhienaag güünle' Dios
bejn ree chi tiëb ree bén Israel güün reeman zi'c rën Dios?

¹³ Yu' ni rënan ganin lëjt bén ad najt ree bén Israel,
lëjt ragbee guial Dios guxhaal naj din gün xtiidxaman
lojdi abi' dád cayünan naguiejn günan zi'c rayal. ¹⁴ Rënan
guial ree bén ladx reen bén Israel ree sëëbladx zi'c rünjdi
din güün reeman zian din chile' gac reeman perdon.

¹⁵ Walican guial chi ad bazoobt ree bén Israel xtiidx Dios,
guyu mod gojc los demazri ree bejn perdon. ¿Per xi nix chi
chililadx reeman xtiidx Dios! Laan naj zi'c chi yaban tijb
bengüt zatijb. ¹⁶ Abi' zi'c chi beenle' Dios bén Israel ree
gulal laan naj tijb sen guial güünle'man los demazri ree
bén Israel, ziangajc bal güünle' Dios xliuj tijb yag guidib
yag guin ma nagle'.

¹⁷ Bén Israel ree naj reeman zi'c tijb yag olivo, per yu'
reeman naj zi'c xidx yag olivo guin ni ma gurug. Abi'
luj guial ad najtil bén Israel najl zi'c tijb xidx yag olivo
ni yu' dajn ni rguuid lod biru' xidx yag olivo guin, zeel
rajpil guialnaban por xliuj yag guin. ¹⁸ Zeel ad naladxil

Gui'ch par ree bén Rom 11:1929Gui'ch par ree bén Rom 11:26

guial mazri zagdxe najl guial loj yag oliv ni rnin naj ree bén Israel. Per bal rüjnl xgab zian, basaaladx guial ad lüjt cudëë guialnaban loj xliuj yag guin, xliuj yag guin cunee guialnaban lojl.

¹⁹ Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.”

²⁰ Waliquil, per xidx yag olivo ni canin naj ree bén Israel, gurug reen guial ad bililadxt reen abi' lüj guyul xluar reen guial rliladxil. Zeel ad rüjnl nabë, zagdxeli gojp cudad. ²¹ Din bal bén Israel ni canin naj ree xidx yag guin, ad bayat Dios laa reeman, ziangajc zajc saquil.

²² Gogbee guial benza'c naj Dios, per ziangajc diidxli rüjn xguialguxtisaman. Ma been xguialguxtisaman con ree bén ad bazooft xtiidxaman, abi' ma beenman ni zagdxe con lüj. Per rayal guibanl zi'c rënman, bal id züjnl zian züjn xguialguxtisaman con lüj. ²³ Abi' bal yayejc ree bén Israel con Dios, abi' chililadx reeman perdon ni zëäd por laaman, züjnman laa reeman cwent con los demazri ree bén Israel rliladx. Din laaman rajp gualrniabee par yayüjnman laa reeman tijbzi con los demazri ree bén Israel. ²⁴ Din lüj guial ad najtil bén Israel, lüj guial canin najl zi'c tijb yag olivo ni yu' dajn, zile' niajqul tijbzi con yag olivo zagdxe ni rnin naj ree bén Israel, jdiixgui ree bén Israel ni ad ruzooft ree xtiidx Dios, nid zayajc reeman tijbzi ya con los demazri ree bén Israel bal guzooft reeman xtiidx Dios!

Gac ree bén Israel perdon

²⁵ Compniar raliduladx ree Jesucrist, yu' ni ad ragbee-tidi abi' rënan gagbeedan, chitëë güüнди nabë. Bén Israel rüjn ree nad par guzooft reeman xtiidx Dios, cayajc zian xt chi ma bayaaloj bililadx ree bén ad najt ree bén Israel, bén ma naj ree par chililadx xtiidx Dios. ²⁶ Chi ma gojc zian,

Gui'ch par ree bén Rom 11:2730Gui'ch par ree bén Rom 11:36

dxei graczi ree bén Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguedx Siön za bén gagnë ree bén zëäd loj xdiaa Jacob. Din yariica reeman loj nejz mal zinal reeman.

²⁷ Dxei gac cumplid da diidxan,

Zi'c ma rën loj reeman guial günan perdon xtol reeman.

²⁸ Per yan guial dád nad ree bén Israel par chililadx reeman xtiidxza'c Jesucrist, zian yu' mod persi rililaxidi guial ad najtidi bén Israel. Abi' majsi zian, rën gajc Dios laa reeman zi'c beenman promisejs loj ree xbéngulal reeman.

²⁹ Din Dios ad rucaat xixgabaman, ni ma bazaladxaman loj bejn, ad rquiettaman laan, ad rbëäladx tëëtaman bén ma gulejman par laaman. ³⁰ Gocli ad binaltidi xnejz Dios, per yan por ree bén Israel ad ruzoobt xtiidx Dios, ma balüüman lëjt guial rayaman lëjt. ³¹ Abi' bal yan ad ruzoobt ree bén Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman. ³² Cwëjb Dios guial zi'c ree bén Israel në ree bén ad najt bén Israel ad ruzoobt reeman xtiidxaman, din gac yayaman gra reeman tiblojzi.

³³ ¡Dád zro' naj xguialrignia' Dios, në xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cayüjnman. ³⁴ Zi'c ca loj xtiidxaman lod rëb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiëb lojman xhienaag güünman? ³⁵ ¿O chu ma badëë xhienin lojman din cwëzaman quixaman laaman?” ³⁶ Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

¹ Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lëjt loj Dios zi'c tijb gon ni ma nagle' ni yayuladx tēeman, din guibandi zi'c rēnman, abi' zian guiēndi laaman. ² Ad guibanridi zi'c naban los demazri ree bén yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaa g rēn Dios guibandi. Zian gagbeedi conin naj zagdxe, conin ruladxaman, con tēenin naj xnej.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabē guial mazri lasajquidi loj ree bejn. Zagdxeli gol been xgab por lëjt zi'c rayal, segun naj quiargueijn ni banee Dios loj tijbgajdi. ⁴ Din zi'c xcuerp bejn zien la' najn, per ad tijbtzi ni rüjnan. ⁵ Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiargueijn ni baca' ree, zi'c naj ni guyēn Dios baneeman dunuj ree. Zeel bal ma baneeman quiargueijn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. ⁷ O bal baneeman quiargueijn par yaguieen ree sirv ben ren ree, rayal yaguieen reen zi'c rayal. Bén cwa' quiargueijn par gulüüman bejn ree xtiidx Dios, rayal gulüüman bejn ree. ⁸ O bén cwa' quiargueijn par gudēeman consejw loj ree bejn, rayal gudēeman consejw. Guiáad bén cwa' quiargueijn par yazaladxaman xhienin loj ree bejn, rayal yazaladxaman con guidib luxdooman. Abi' bén cwa' quiargueijn par nabeeman, rayal gapaman cudad nabeeman zi'c rayal, o bén cwa' quiargueijn par güünman yudar bén cazagdiaj ree, rayal chu' luxdooman zagdxe güünman laa reeman

Gui'ch par ree bén Rom 12:932Gui'ch par ree bén Rom 12:21

yudar.

Ni rayal güün ree bén rlıladx Jesús

⁹ Gol guyën lasa'di con guidib luxdoodi, gol basa'n ree ni mal tıblad, gol binal ni zagdx. ¹⁰ Gol guyën gra ree bejn zi'c tijb bijchidi, ad rüjn lëjt gajc benro', gol gojp respejt lasa'di.

¹¹ Ad gaquidi bén ploj par güüندی ni rayal güüندی, con guidib luxdoodi gol been sirv loj Dios.

¹² Gol badxe' luxdoodi zagdx por ni cabëzidi tia'di, gol gudaan tëe loj ni rzagdiajdi, ad gucwëez cwedx guiniabidi Dios.

¹³ Chi xhie ryaadx xcompniaridi, bén rlıladx ree Jesucrist, gol been reeman yudar. Gol gojc benza'c con ree bén ri't lidxidi.

¹⁴ Gol gurejdx Dios por ree bén rzunal lëjt par güün reeman lëjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

¹⁵ Gol badxe' luxdoodi nix con ree bén yu' luxdoo nix, per con ree bén yu' luxdoo naya, gol been naguiejn din gagbee reeman guial za'quidi con laa reeman.

¹⁶ Gol gubajn zagdx con ree lasa'di, ad güüندی nabë, gol gojc bén naxanladx. Ad naladxidi mazri rajquidi guial loj ree ben ren.

¹⁷ Ad güüندی ni mal bén rüjn lëjt ni mal, gol been naguiejn güüندی ni zagdx loj gra ree bejn. ¹⁸ Gol been naguiejn da't din cwenëdi bejn ree zagdx. ¹⁹ Compniar ralıduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: “Naj naj bén rayal güün xguialguxtis, gudë tëen ni rayal bejn. Zian rëb dux Dad ree Dios.” ²⁰ Rëb tëëman: “Bal rlıaan bén rdxe'ch lüj, badëed ni gawaman, o bal re'caman nijs, badëed ni guië'man, zian guguaal yatuman.” ²¹ Ad bal

Gui'ch par ree bén Rom 13:13Gui'ch par ree bén Rom 13:9

tiëbil güün ni mal lüj gan, been ni zagdxe din güünl ni mal guin gan.

13

Royal yaya'p ree guxtis respejt

¹ Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëäd guialrniabee ni rajp reeman. ² Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguuil xcasti, ³ din bén rajp ree guialrniabee ad za't reeman par guchejb reeman bén rüjn ree ni zagdxe, za' reeman par guchejb reeman bén rüjn ree ni mal. Yan bal rënl guibanl guial ad zadxebtil bén ca' ree guialrniabee, gubajn zagdxe din yaya'nl zagdxe loj reeman. ⁴ Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil bén ca' ree guialrniabee, din ad ca' xlia'tzi reeman guialrniabee guin, laa reeman cayüjn sirv loj Dios din gudëäd reeman casti bén rüjn ree ni mal. ⁵ Zeel rayal guzoobidi xtiidx ree bén ca' ree guialrniabee, ad güündi zian naabzi par ad zayaltidi casti, gol been zian guial ragbeedi zian rayal güündi. ⁶ Gol gudijx tëë impuest, din gusnuu nabee ree bén ca' ree guialrniabee, din laan naj mandad bayal reeman par güün reeman sirv loj Dios.

⁷ Zeel gol badëäd ni rayal gudëädidi, bal rayal cwe'quidi milia, gol gule'can o bal rayal quixidi impuest, gol gudi-jxan. Gol bazoob xtiidx bén rayal guzoobidi xtiidx, gol gojp respejt bén rayal respejt. ⁸ Gol been naguiejn gol baguijx ni ralidi loj ree bejn, abi' ad rayalt gucwëöz guiëndi bejn ree. Din bén rën bejn ree, ma cayüjnman cumplid gra ni rniabee xley Dios. ⁹ Xmandamient Dios rëban: “Ad sunël bén ren bén ad najt lacheelil, ad gugüjtil

Gui'ch par ree bén Rom 13:1034Gui'ch par ree bén Rom 14:4

bejn, ad cwanl, ad sөөbladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rөb: “Guyөн ben ren ree zi'c rөн lүj gajc.” ¹⁰ Din бөн rөн bejn ree ad zajct güünman laa reeman ni mal guial rөнman laa reeman. Zeel con guial rөн lasa' bejn rayaaloj rүjnman gra ni rөb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman. ¹² Mazri caydop tiamp guin, abi' mazri cabig dxej gui'taman, zeel rayal yasa'n ree ni rinө dunuj ree loj nejl mal, abi' yaguieen ree naguiejn yaguieen ree ganax ni zagdxe din yunaal ree nejl zagdxe. ¹³ Rayal yabajn ree zagdxe zi'c rayal, ad yaguieen ree ni natu. Ad yazүdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunө bejn ben ren бөн ad najt lacheelaman, o guial gapaman graloj vijs, o guialrdil o guialrdөdloj. ¹⁴ Gol basa'n lөjt gajc loj dux Dad ree Jesucrist, ad rayalt guibandi zi'ctzi rөndi.

14

Ad gusa'nxtudi бөн qui rliladxri xtiidx Dios

¹ Zagdxe gol guneeө бөн qui rliladxri Jesucrist ad gusa'nxtudi laaman guial mazri rajquidi guial lojman. ² Din yu' ree бөн rliladx Jesucrist naladx reeman zajc gaw reeman xhietөөz nin, per yu' ree бөн qui rliladxri naladx reeman guial zagdxeli naj ad zajwt reeman бөөл. ³ Бөн rүjn xgab guial zajc gawaman xhietөөz nin, ad rayalt güünman tiblad бөн naladx yu' ni ad zajct gaw bejn. Guiáad бөн rүjn xgab guial yu' ni ad zajct gaw bejn, ad rayalt guze'man бөн naladx zajc gaw bejn xhietөөz nin. Din niz loj Dios tiblojzi ma naj reeman xbejnman. ⁴ Zeel, ¿chu naj bejn din guze' xcompniaraman бөн rliladx Jesucrist por niguinzi ree?

Diosqui ragbee bal cay jnman ni zagdxe o cay jnman ni mal. Abi' bal ad wayignia'taman xhienaag g nman, dxel dux Dad ree Jesucrist rajp gualrniabee par gagn man laaman g nman zi'c rayal.

⁵ Ziangajc yu' ree dux compniar ree b n raliduladxn  ree Jesucrist naladx reeman guial yu' dxej zobjloj, yu'za ree b n naladx guial tiblojzi naj gra dxej, per achet g nman, tijbgaj bejn con ni naladxaman naj zagdxe par laaman. ⁶ Din b n r jn xgab guial yu' dxej zobjloj, r jnman zian persi r nman Dios. Gui ad b n naladx guial tiblojzi naj gra dxej, r jnman zian persi r nman Dios. Abi' b n raw graloj, rawaman guial yu'guijcaman guial por Dios z edan abi' rud eman quixt  lojman. Gui ad b n naladx guial yu' ni ad zajct gaw bejn, r jnman zian guial naladxaman zian cayajpaman Dios respejt abi' rud eman quixt  lojman.

⁷ Ni'qui du tijb ree ad nabant ree por dux xgabzi ree, o ad zay jt ree por dux xgabzi ree. ⁸ Bal nabajn ree por dux Dad ree Jesucrist par laa t eman nabajn ree. Abi' bal yay jt ree por laaman par laa t eman yay jt ree. Zeel bal nabajn ree o yay jt ree, par dux Dad ree Jesucrist ma nayajc ree. ⁹ Din par zian g jtaman abi' babanman, din gacaman Dad loj ree b n naban n  loj ree b n ma g jt.

¹⁰  Chexquiza din guze' lasa'l b n rliladx Jesucrist o g n lasa'l tibladi ya? Awa dugra ree rayal yadxu' loj Dios din yad ed ree cwent lojman. ¹¹ Zi'c ca loj xtiidxaman lod r b:

Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn gui b guial naj naj Dios.

¹² Abi' tijbgaj dunuj ree rayal yad ed ree cwent loj Dios, per por dunuj gajc ree.

Ad gusajbidi bejn loj dol

¹³ Zeel ad rayalt yaneeguijdx du lasa' ree bén riladx ree Jesucrist, zagdxeli yaguieen ree naguiejn yaya'p ree cudad chitëe por dunuj ree güün reeman dol. ¹⁴ Naj najn xbejn Jesús, ragbeen guial ad dolt naj gaw bejn xhietëeznin. Per par bén naladx guial ad zajct gawaman xhietëeznin, par laaman dolan cayüjnman bal gawaman xhietëeznin. ¹⁵ Yan bal por ni rawil naladx tijb xcompniaril bén riladx Jesucrist guial dolan cayüjnl, abi' bal id ridxga'l laaman rën guiëban guial ad rëntil laaman. Gojp cudad chitëe por ni rawzil güün xcompniaril dol, din nëgajc por laaman güjt Jesucrist loj crüjz. ¹⁶ Ad güünl tijb ni guinieeguijdx ree xcompniaril lüj, majsı lüj ragbee guial ad ni malt naj ni cayüjnl. ¹⁷ Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tée luxdooan nix por xSprıjt Dios. ¹⁸ Abi' bén naban zian guial zinalaman Jesucrist, cayüjnman zi'c rën Dios, zi'c ruladx tée bejn.

¹⁹ Zeel rayal yaguieen ree naguiejn yabajnnë' du lasa' ree zagdxë yabedxe tée du luxdoo ree, din yasnuu yayagbee ree xhienaag yunaal ree xnejz Dios. ²⁰ Gol gojp cudad chitëe por ni rawzidi gunıjtıdı tijb xbejn Dios. Walıcan graczi zajc gaw bejn. Per ni mal guin naj bal par xcompniaril dolan cayüjnl. ²¹ Zeel zagdxeli naj guial ad zajwtil bëel ad zë' tëetil vin o xhie stıjb nin bal por laan güün xcompniaril dol. ²² Majsı lüj ragbee guial achet güünan gaw bejn xhietëeznin, per zagdxeli lüjzi con Dios. Naj rni guial, xıquılbaa bén ad yu'nawëegt luxdoo rawaman xhietëeznin! ²³ Per bén yu'nawëeg luxdoo par gawaman xhıenin, abi' gawaman laan laagajcaman ma cayüjn dol guial ad cayawtraman guıdıb ladxaman. Bal naladx bejn ad laat naj ni cayüjnman, dxel laagajcaman cayüjn dol.

15

Royal yaguieen ree ni naladx bejn naj zagdxe

¹ Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bén ad wazudxi'cht loj guialrliladx Jesucrist luar yaguieen ree ni rayentzi ree, ² dugra ree rayal yaguieen ree naguiejn din chu' luxdoo dux compniar ree zagdxe con dunuj ree. Abi' rayal yaguieen ree ni naladx reeman naj zagdxe, din chile' gusnuu güünbee reeman xnejz Dios. ³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: “Naj bayal gra ree diidx mal ni ninia reeman lojl.” ⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në guialragnë chitëë yalenyä' ree yalëjz ree ni ralëjz ree yaca' ree. ⁵ Dios, bén razaladx pacens në guialragnë chitëë yalenyä' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. ⁶ Din tiblojzi guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bén ad najt bén Israel.

⁷ Zeel, zi'c baca' Jesucrist lëjt par gaquidi xbejn-man, ziangajc gol guneenë ree xcompniaridi zagdxe, bén rliladx ree laaman par guiliesidi xvalor Dios. ⁸ Gol basaaladx guial bi't Cristo loj guidxliuj par gulüüman bén Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rüjnqui Dios cumplid xtiidxaman. ⁹ Bi't tëë Cristo loj guidxliuj din por laaman, bén ad najt ree bén Israel guilies reeman xvalor Dios guial rayaman laa reeman, zi'c ca loj xtiidxaman lod rëb:
Xt loj ree bén ad najt bén Israel guzatan lüj
guial najl benza'c.

Gui'ch par ree bén Rom 15:1038Gui'ch par ree bén Rom 15:19

Gol tēen cant ree par lūj.

¹⁰ Ziangajc rēb zatibljaj loj xtiidx Dios:

Lējt bén ad najt ree bén Israel,
gol babaa zi'c rabaa ree bén Israel.

¹¹ Zatibljaj loj xtiidx Dios rēb:

Gra ree bén ad najt bén Israel.

Nē los demazri ree bejn, gol gules xvalor Dios.

¹² Rēb tēē Isaías:

Loj xdiaa Isaí, grii tijb bén nabee bēnguidxliuj ree,
xt ree bén ad najt bén Israel, chililadx laaman.

¹³ Dios bén ragnē dunuj ree ralējz ree ni caylējz ree, laaman yagu' luxdoodi zagdxē yabe'cdxē tēēman luxdoodi guial rililadxidi laaman, din cwēz da'tidi ni guneeman por xSprijt Dios.

¹⁴ Compniar raliduladx ree Jesucrist, naj ragbeechaaw guial zagdxē nabandi con ree xcompniaridi, ma ragbee tēēdi zagdxē xhienaag chinalidi xnejz Dios, xt rajc rudēēdidi consejw rulūū tēē xcompniaridi. ¹⁵ Per majsi zian, tio'p choon lajt loj gui'ch guie bacan diidx naa, din yasaal-idxidi xhienaag guibandi. Rūnan zian por guialrniabee ni ma banee Dios naj, ¹⁶ din gūnan sirv loj Jesucrist. Din da dxiinan naj gulūn bén ad najt ree bén Israel xtiidxza'c Dios din guiban reeman zi'c rēn Dios, din gac reeman naya niz lojman por xSprijtaman. ¹⁷ Ra'pan xhie gūnnē'n nabē, guial ragnē Jesucrist naj por ree dxiin cayūnan por Dios. ¹⁸ Per achetczi zajc guiēn bal id zēn guial por Cristo cayūnan laan, din laaman cayagnē naj persi cayūnan yudar bén ad najt ree bén Israel din gac chililadx reeman guzoob tēē reeman xtiidx Dios. Yan ma rililadx reeman laaman por ni rēn loj reeman nē por guial ruguiaa reeman xhienaag nabanān, ¹⁹ nē guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi,

Gui'ch par ree bén Rom 15:2039Gui'ch par ree bén Rom 15:29

diizd Jerusalén xt guidib niz Ilírico. ²⁰ Din zian naj da xgaban günan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo, ²¹ zi'c ca loj xtiidx Dios lod rëb:

Bén ad waguiejnt ree xcwentaman,
güünbee reeman laaman.

Guiáad ree bén ad wayagbeet xcwentaman,
gagbee reeman laan.

Rüjn Pab xgab cheman Roma

²² Abi' guial wan guidibczi lod ma rnin lojdi, zeel ad wayajct gan guidganan lëjt, majsi zianczi guyënan nidganan lëjt. ²³ Per yan guial ma gulox gutiechan xtiidx Dios guidib niz guie, abi' guial ma gojc zien ijz ni rënan guidganan lëjt, ²⁴ zeel rünan xgab guidganan lëjt chi gan España. Abi' chi gadëëdan guguian lëjt, chi ma gojc tio'p choon dxej yu' luxdoon zagdxe guial za'n con lëjt, dxel ma güüнди naj yudar din gan España. ²⁵ Per yan yaloj gan Jerusalén chigsa'n nan tijb yudar par ree dux compniar ree bén rliladx ree Jesucrist. ²⁶ Din bén Macedonia ree con ree bén Acaya bén rliladx gajc ree Jesucrist, been reeman xgab guto'p reeman yudar guin par ree bénprob zojb ree Jerusalén, bén rliladx ree Jesucrist. ²⁷ Abi' por xixgab reeman guixhiaal reeman yudar guin, per zagdxe naj ni cayüjn reeman din mal nuzëëb reeman loj reeman. Din por ree bén Israel bidxin xtiidx Dios loj reeman, dxel yan laa reeman guial ad najt reeman bén Israel, zagdxen guial güün reeman yudar bén Israel ree zi'ctzi gac reeman. ²⁸ Zeel chi ma balooxan dxiin guie, chi ma bayün yudar guin, dxel gan España, abi' chi gadëëdan ladxidi dxel guidganan lëjt. ²⁹ Naj ragbee guial chi guidganan lëjt, zien da't ni gunee Dad Jesucrist par ganin lëjt.

Gui'ch par ree bén Rom 15:30Gui'ch par ree bén Rom 16:7

³⁰ Yan por dux Dad ree Jesucrist në guial rën xSprijt Dios dunuj ree, rniaaban lojdi din güüندی naj yudar yarejdx yanaab ree Dios por naj. ³¹ Gol gurejdx gunab Dios din gagnëman naj loj ree bén Judea, bén ad rlıladxt ree Jesucrist, gol gurejdx tēē Dios por dux compniar ree bén rlıladx ree Jesucrist, bén zojb ree Jerusalén din tiēb reeman tia' reeman yudar ni chigsa'nan par laa reeman. ³² Dxel bal gagnë Dios ma chu' luxdon zagdxē guidganan lējt dxel ma zajc yaziiladxan la'tgaj za'n con lējt. ³³ Dux Dad ree Dios bén rabe'cdxe du luxdoo ree, laaman gagnë gradi. Amén.

16

Rugajpdioz Pab bejn ree

¹ Yan ni gui't Febe ladxidi, béngunaa ni naj dux compniar ree guial ralıduladx ree Jesucrist, bén cayüjn tēē sirv lēn yadoo ni zojb guiedx Cencrea. ² Gol baca'man zagdxē por Dad Jesucrist, zi'c rayal yaguieennë' ree dux compniar ree bén rlıladx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nēgajc naj ma beenman yudar.

³ Gol bagajpdioz Aquila con xbéngunaaman Priscila, bén cayüjn ree naj yudar cayguieenan sirv loj Jesucrist.

⁴ Abi' laa reeman xt guzuj reeman loj guialgüjt por naj, zeel rudēn quixtēē loj reeman. Abi' ad najtzi rudē quixtēē loj reeman në ree dux compniar ree bén rlıladx ree Jesucrist bén ad najt ree bén Israel rudēē quixtēē loj reeman.

⁵ Gol bagajpdioz ree bén rlıladx Jesucrist, bén rado'p ree lidx Priscila con Aquila. Gol bagajpdioz da miwan Epeneto, bén goc bén yaloj bililadx xtiidx Jesucrist niz Acaya.

⁶ Gol bagajpdioz Li, bén ma been da't lējt yudar.

⁷ Gol bagajpdioz ree bén ladxan Adrónico con Junias, bén guyu'në' reen ladxguiib. Abi' ree xi apóstoles Jesús dád

Gui'ch par ree bén Rom 16:841Gui'ch par ree bén Rom 16:20

rën reeman laa reeman, abi' yaløj laa reeman bililadx Jesucrist guial lon.

⁸ Gol bagajpdioz Amplias, da miwan bén rën da'tan guial nayajcan xbejn Jesucrist. ⁹ Gol bagajpdioz Urbano, bén cayüjn naj yudar cayguieenan sirv loj Jesucrist. Gol bagajpdioz tää da miwan Estaquis. ¹⁰ Gol bagajpdioz Apeles, bén ma balüü guial diidxliczi riladxaman Jesucrist, gol bagajpdioz tää xfamil Aristóbulo. ¹¹ Gol bagajpdioz tää Herodión ben ladxan, në ree xfamil Narciso, bén ma rililadx Jesucrist. ¹² Gol bagajpdioz Trifena në Trifosa, bén cayüjn ree sirv loj Jesucrist. Gol bagajpdioz tää Pérsida, bén naguieenbee ree guial dád cayüjnman sirv loj Jesucrist. ¹³ Gol bagajpdioz Rufo, bén diidxliczi zinal xnejz Dios, gol bagajpdioz tää xniaaman, bén rënan zi'c da nan. ¹⁴ Gol bagajpdioz Asíncrito, Flegonte, Hermas, Patrobas, Hermes në gra ree bén za' con laa reeman, bén ma rililadx ree Jesucrist. ¹⁵ Gol bagajpdioz Filólogo, Julia, në Nereo con bizanman, në Olimpas con gra ree bén rililadx Jesucrist bén za' ree con laa reeman.

¹⁶ Gol bagajpdioz lasa'di zi'c rayal. Dux compniar ree bén raliduladx ree Jesucrist bén za' ree guie, rugajpdioz reeman lëjt.

¹⁷ Compniar raliduladx ree Jesucrist, rniaaban lojdi din gapidi cudad con ree bén rlia' lasa' ree bejn, bén rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, ¹⁸ din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxza'c rüjn reeman gan bén ad ragbeetczi ree o bén ad ragbeeza'ct ree xtiidx Dios. ¹⁹ Per lëjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güüнди ni zagdxе ad par güüntidi ni mal. ²⁰ Dios, bén rabe'cdxe luxdoo bejn, laaman gagnë

Gui'ch par ree bén Rom 16:2142Gui'ch par ree bén Rom 16:27

lëjt nayob chitëë güünri xindxab lëjt gan. Dux Dad ree Jesucrist gagnë lëjt.

²¹ Rugajpdioz Timoteo lëjt, bén cayüjn naj yudar con xchiin Dios ni cayünan, në ree bén ladxan bén la ree Lucio, Jasón, në Sosípater, rugajpdioz reeman lëjt.

²² Në Tercio, bén cayüjn gui'ch guie rugajpdioz lëjt por dux Dad ree Jesucrist.

²³ Nëtëë Gayo rugajpdioz lëjt, lidxaman za'n, runee tëë lidxaman rado'p ree dux compniar ree bén rliladx ree Jesucrist. Në Erasto, bén naj tesorer luguiedx guie në bén la Cuarto ben rliladx Jesucrist, rugajpdioz reeman lëjt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radëën quixtëë loj Dios din laaman zile' gagnë lëjt din gusnuu gagbeedi sudxi'ch tëëdi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diizd chi gad guidxliuj gacchaaw, xgab ni ad gogbeet ree bejn diizd guia'xchej. ²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bén badëë xtiidx Dios loj ree bejn zi'c gunabee Dios laa reeman, bén naban goctëëz. Abi' guidibczi care'ch xtiidx Dios din chililadx ree bejn Jesucrist guzoob tëë reeman xtiidxaman.

²⁷ ¡Tijbzi Dios, bén rajc gradooczi, rayal yaya'p reeman respejt zianczi por Dad Jesucrist! Amén.

Xtiidx Dios

New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 13 Jun 2022

fb4ebcb8-e1f4-5bfc-b08c-f590e137d86d